



EDISI
BM

PERCUMA
KDN PP11732/12/2012 (032229)
UNTUK AHLI SAHAJA

MEI 2017

KEMAS KINI HARIAN UNTUK ANDA: BERITA, RENCANA, WAWANCARA, ANALISIS POLITIK SEMASA

www.roketkini.com

DITUBUHKAN PADA 1966
DI KUALA LUMPUR

Rocket

facebook.com/roketkini

twitter.com/roketkini

roketkini@gmail.com

JANGAN PERALAT AGAMA
DEMI KEPENTINGAN POLITIK
- TUN DR MAHATHIR > muka 13

www.dapmalaysia.org



/RUU355: SANDIWARA PARLIMEN

Berita penuh ms 3

- ▶ Perbahasan ditangguhkan. Ahli Parlimen Pakatan Harapan tiada peluang berbahas.
- ▶ Yang DiPertua Dewan Rakyat tak nak jadi “**bloody fool**”

CHEF WAN PUJI PENTADBIRAN PULAU PINANG

“Hanya orang bodoh tidak boleh melihat semua ini seperti masing-masing ada agenda tersendiri kononnya takut itu dan ini.” ms 8



NOTA EDITOR

Ahli-ahli Parlimen punya tanggungjawab besar untuk menggubal undang-undang dengan teliti. Dewan Rakyat pula bukannya kilang pembuatan undang-undang untuk mengabsahkan kehendak pihak-pihak tertentu demi kepentingan politik masing-masing.

Kalau bangkit mempersoal perkara yang sah pun tak boleh, tak payah lah masuk Parlimen. Lim Kit Siang boleh duduk di rumah, jaga cucu. Ahli-ahli Parlimen pembangkang yang lain pula boleh buka gerai di sepanjang Jalan Parlimen, menjual nasi lemak, baju bundle dan sebagainya sebagai duit tepi.

Ketika RUU355 dibentang Kit Siang bangkit tanpa langsung menyentuh usul Hadi, bahkan menyerang pimpinan Barisan Nasional, terutamanya MCA dan Gerakan yang tempoh hari terkinja-kinja apabila BN memutuskan tidak mengambil alih usul terbabit.

Ahli Parlimen Puchong, Gobind Singh Deo pula bangkit mempersoalkan isu sub judis, namun Tan Sri Speaker berhujah bahawa mahkamah tidak boleh masuk campur dalam prosiding parlimen.

Padahal Speaker yang sama juga sebelum ini membuat keputusan menghalang sebarang perbahasan dan soalan tentang skandal 1MDB dengan alasan bahawa terdapat tindakan mahkamah dalam soal itu dan tidak mahkamah tidak boleh masuk campur dalam perbahasan dan pantas lari meninggalkan Dewan.

Kalau akar umbi masyarakat masih belum nampak ini semua permainan politik dengan cubaan melibatkan Tuhan, entah lah apa nasib umat negara ini.

KETUANAN ISLAM-MELAYU

Oleh DATUK ARIFF SABRI

Satu hari akan tiba, apabila kita ditanya, mengapa kita melakukan kemungkar, bermusuhan sesama sendiri, bahkan hingga sampai kepada tahap muhamederakan sesama sendiri. Ketika itu, bila kita sedar kita akan kata bahawa kita jadi begini sebab kita dengar hasutan ketua dan pembesar-pembesar kita dan mereka membawa kita kepada kesesatan.

Orang Melayu akan menyumpah pembesar-pembesar mereka, tak kira ustaz atau pemimpin sekular dengan maki dan cerca kerana mereka yang menyebabkan kita bermusuhan sesama sendiri.

Janganlah kita ikut pemimpin dan pembesar-pembesar kita secara membabi buta. Analisalah baik-baik apa yang mereka kata dan anjur. Bukan berdosa jika menilai dan menimbang anjuran-anjuran mereka.

Sekarang makin ramai orang Melayu sedar bahawa segala ribut mengenai pindaan RUU355 hanya kerja politik sahaja. Ahli PAS rupanya ramai yang tidak tahu mengenai RUU355 itu sebetulnya. Orang Melayu awam pun tidak tahu.

Hanya mereka rasa diperas ugut jika tidak sokong, akan dikata murtad dan tidak cukup Islam. Sokongan yang diperolehi melalui peras ugut, adalah perbuatan yang tidak bertanggung jawab.

Presiden PAS, Datuk Seri Abdul Hadi Awang sendiri kata, kemenangan untuk RUU355 ialah untuk politik Islam. Timbalan Perdana Menteri, Datuk Seri Zahid Hamidi pula kata, kemenangan RUU355 ini ialah untuk menyatupadukan orang Melayu. Bukan untuk Islam, tapi untuk menyatupadukan Melayu.

Maka, saya kata – isu RUU355 ini ialah agenda politik. Ianya tidak ada kena mengena dengan agenda memperkasakan Islam kembali.

Siapa yang mengancam Islam dan Melayu?

Saya pun tertanya-tanya, siapakah yang mengancam Islam kita? Siapa pula yang mengancam orang Melayu? Permainan menyalahkan orang lain ini, perlulah dihentikan. Kita mendapat apa yang kita usahakan.

Jika orang Cina mengancam Islam, sila nyatakan bagaimana? Jika Cina mengancam orang Melayu, sebut bagaimana? Apa yang menyekat kerajaan Melayu mengambil tindakan jika ia benar? Tangkaplah orang Cina tersebut, humban mereka ke laut.

Kepada saya yang fakir ini, kenyataan-kenyataan Hadi Awang dan Zahid Hamidi ialah kenyataan agenda politik. Yang pertama ketuanan Islam dan yang kedua ketuanan Melayu.

Definisi ketuanan Islam ialah siapa tidak ikut cara Islam kami, bukan dari golongan kami. Ketuanan Melayu pula, sesiapa tidak setuju dengan

kami adalah anti-Melayu dan musuh kita.

Kepada saya dan sebahagian besar orang Melayu yang rasional di Malaysia, yang tahu Islam mereka atau tanggungjawab Islam mereka, agenda ini bahaya kerana rupa-rupanya dua agenda ini digunakan untuk melagalkan rakyat Malaysia. Juga untuk menyembunyikan kegagalan dan kelemahan.

PAS menyembunyikan rekod dan kegagalan membangun bersama Islam mereka. UMNO guna Isu ini kerana menyembunyikan jenama nasionalisme Melayu ekstrim yang ditolak oleh bangsa Melayu sendiri.

Mereka yang bersikap lebih mulia dari orang lain dan membezakan orang lain mengikut penarafan mereka hanya mewujudkan perpecahan. Kita benci pada mereka yang menganggap mereka lebih mulia dari kita. Demikian juga ketuanan Melayu, satu pihak mengesahkan dan memperakui kita Melayu atau tidak.

Kedua jenis ketuanan ini bahaya dan tidak bertanggungjawab. Negara jadi huru hara kalau satu pihak yang beroperasi di atas dua sifat ketuanan ini melihat legitimate objection sebagai boleh mengisyitiharkan perang. Kedua aliran ini mesti ditolak oleh semua orang yang berfikiran rasional.

*Datuk Ariff Sabri adalah Ahli Parlimen Raub dan Ahli Jawatankuasa DAP Pahang.

HARAPAN MENGORAK LANGKAH

Oleh WAN HAMIDI HAMID

Dua cabaran utama yang perlu Harapan tangani segera dengan penuh berhemah adalah:

- Politik kaum dan agama yang dimanipulasi media arus perdana pro-UMNO-BN serta konco-konconya. DAP khususnya terus menjadi sasaran atas prinsipnya yang mengutamakan kebebasan, hak dan peluang saksama, keadilan sosial dan solidariti kerana semua nilai ini mencabar dominasi politik perkauman UMNO-BN; dan

- Isu hudud dan pindaan Akta Mahkamah Syariah atau Rang Undang-Undang 355. Hari ini hudud bukan lagi tajuk besar media kerana sudah ada pula cadangan undang-undang pra-hudud RUU355 dibawa ke Parlimen. Hal agama menjadi alat manipulasi politik.

Menangani kedua-dua perkara ini bukan bererti Harapan juga perlu bermain politik perkauman dan agama. Pihak pembangkang tidak usah melayani agenda kotor; tidak perlu menari mengikut gendang UMNO-BN.

Yang penting, para pemimpin dan ahli Harapan perlu memastikan isu-isu kaum dan agama tidak akan mengabui mata kita daripada isu sebenar seperti kemerosotan ekonomi, pengangguran, peluang pekerjaan, kerendahan mutu

pendidikan, peluang perniagaan, dan pelbagai masalah lain yang tidak mengira gender, kaum, agama, atau wilayah.

Memang ada di kalangan kita merasa bosan dan jemu apabila mendengar perkataan “ekonomi” kerana terbayang hal-hal yang berkaitan dengan nombor, rajah, graf, garisan, skandal kewangan mega, dan segala istilah yang sukar difahami.

Cuma apabila disebut “wang” atau “duit” – terutamanya apabila poket atau dompet semakin menipis, dan akaun bank semakin kurang simpanannya, atau ada pihak tawarkan sumbangan wang, pekerjaan, rumah, dan sebagainya – baru kita rasa pentingnya hal-hal ekonomi.

Masalah ekonomi semakin menekan kita. Bukan penyokong Harapan sahaja yang menderita akibat salah urus ekonomi negara, malah akar umbi yang menyokong UMNO-BN dan PAS juga merasai kepedihan ini. Hanya golongan atasan dan pucuk pimpinan serta kroni mereka sahaja yang masih hidup senang-senang.

Jadi, Pakatan Harapan perlu memberi lebih dari sekadar harapan. Ia mestilah mengemukakan alternatif yang meyakinkan semua rakyat bahawa ia mampu memulihkan ekonomi, iaitu menangani kenaikan harga barang dan perkhidmatan, menstabilkan harga minyak, kos sara hidup, kos pendidikan, kos kesihatan, beban GST, penurunan

nilai ringgit, ketirisan pengurusan kerajaan, dan pelbagai lagi.

Politik tanpa benci

Pada masa yang sama, Harapan perlu membawa era baru politik yang tidak menyekat kebebasan rakyat bersuara, yang mengamalkan undang-undang dan mahkamah yang adil serta saksama, yang menghormati sesama insan walau apa pun kepercayaan dan pegangan mereka.

Pakatan Harapan perlu mengelak daripada meniru cara UMNO-BN yang menyemai benci. Bagi UMNO-BN, sementara lidah mereka mengaku wira agama dan moral, amalan mereka keji dengan menabur kebencian antara kaum dan agama.

Sebagai contoh, UMNO dan konco-konconya menyebar fitnah kononnya Pakatan Harapan Pulau Pinang menindas orang Melayu di negeri itu kerana mementingkan kaum Cina dan India. Manakala MCA, Gerakan dan MIC pula menuduh kerajaan negeri meminggirkan kaum Cina dan India demi mengutamakan orang Melayu.

Hakikatnya, kemajuan dan kemakmuran yang dikongsi bersama rakyat pelbagai kaum di Pulau Pinang jauh lebih baik daripada zaman pentadbiran BN. Selain laporan kewangan kerajaan negeri, laporan Ketua Audit Negara positif kepada Pulau Pinang sejak Pakatan memimpin pada 2008.

Kerajaan Pakatan berjaya mengubah Pulau Pinang daripada negeri tercorot di bawah pentadbiran BN pada 2006-07 kepada juara kadar pertumbuhan Keluaran Dalam Negara Kasar (KDNK) per kapita bagi 2014-15.

Kejayaan itu membolehkan rakyat Pulau Pinang mendapat pelbagai manfaat, termasuk bantuan tunai RM400 juta setiap tahun seperti pemberian RM100 untuk warga emas, ibu tunggal, suri rumah, orang kelainan upaya, dan murid sekolah, dan bayaran sekali sahaja RM1,000 untuk urusan jenazah, RM200 untuk bayi baru lahir, dan RM1,000 untuk mahasiswa tahun pertama.

Pakatan Harapan perlu komited untuk mengorak langkah seterusnya ke arah mewujudkan suasana hidup yang harmoni, adil, makmur dan bermaruah.

Untuk mencapai matlamat itu, Harapan tidak boleh lagi mengulangi kesilapan masa lalu. Pucuk pimpinan serta para pemimpin negeri dan anggota akar umbi perlu saling percaya antara satu sama lain. Perlu ada kepatuhan kepada keputusan bersama, dan yang paling penting, jangan suka-suka mengubah keputusan yang sudah diputuskan bersama.

Perpaduan yang tulen datangnya dari hati yang ikhlas. Sesekali keikhlasan memang wujud dalam arena politik. Apabila ini berlaku maka terjadilah perubahan yang kita semua harapkan.

Jangan peralat agama demi kepentingan politik — Tun Dr Mahathir

SHAH ALAM: Bekas Perdana Menteri, Tun Dr Mahathir Mohamad berkata tindakan kerajaan UMNO-Barisan Nasional (BN) membenarkan usul persendirian Presiden PAS, Datuk Seri Abdul Hadi Awang berhubung pindaan Akta 355 atau RUU355 dibawa ke Parlimen hanya sebagai alat meraih kepentingan politik semata-mata.

Menurutnya, usul Hadi itu telah dijadikan alat politik Perdana Menteri, Datuk Seri Najib Razak dan hanya menyebabkan perpecahan dalam kalangan umat Islam di Malaysia.

Kenyataan itu jelas dilihat berdasarkan setelah beberapa kali usul tersebut ditangguhkan sebelum ini dan apabila Speaker Dewan Rakyat, Tan Sri Pandikar Amin Mulia menunda perbahasan RUU355.

“Ia (RUU355) nak digunakan untuk politik, politik sebuah parti saja.

“Saya harap dia (Najib Razak) hilang semua undi, pasal dia menipu nak guna agama nak dapat sokongan tapi gagal,” katanya seperti dilapor Malaysiakini.

Pengerusi Parti Pribumi Bersatu Malaysia (PPBM) itu berkata, RUU355 itu juga tidak berkaitan dengan agama Islam kerana agama tidak meminta penganutnya melakukan sesuatu untuk memecah-belahan masyarakat.

“Sebenarnya ini bukan ada kaitan dengan agama Islam. Agama Islam tidak meminta kita buat sesuatu untuk pecah belahan orang Islam.

“Dalam negara yang berbilang kaum, berbilang agama, kita mestinya sensitif terhadap agama lain kerana Islam hormati agama lain. Kita tak boleh buat sesuatu yang memaksa orang lain, berasa takut kepada agama Islam,” ujar beliau.

Jangan terperangkap polemik usul Hadi, fokus masalah utama negara — Dr Abdul Aziz Bari

KUALA LUMPUR: Kontroversi yang timbul akibat usul persendirian Presiden PAS Datuk Seri Abdul Hadi Awang melibatkan pindaan Akta 355 atau rang undang-undang (RUU) 355 dicipta untuk mengalih perhatian rakyat dari isu sebenar yang melanda negara.

Demikian pandangan tokoh perlumbaan, Dr Abdul Aziz Bari yang menyifatkan polemik RUU355 sebagai konflik antara demokrasi dan kleptokrasi.

“Majoriti umat Islam sendiri tak faham isu sebenar termasuk mereka yang diusung dan dibawa berdemonstrasi.

“Tetapi ia sangat emotif sengaja dicipta untuk memainkan semangat dan sentimen umat Islam yang cintakan agama mereka sedangkan ia bukan isu pokok,” katanya ketika dihubungi.

Malah, beliau berpandangan, isu yang diperbesar-besarkan PAS dengan dokongan senyap dari UMNO itu menyebabkan perpecahan dalam kalangan rakyat Malaysia khususnya umat Islam sendiri.

“Hatta dalam soal bidangkuasa pun, apa yang dikemukakan tidak dibenarkan dibincang dan UMNO sendiri enggan mengemukakan pindaan berkenaan kerana takut hilang sokongan bukan Islam khususnya di Sabah dan Sarawak,” katanya.

Ahli Jawatankuasa DAP Selangor itu menjelaskan usaha

meningkatkan dan memperkasa Mahkamah Syariah bukan sekadar menaikkan kuasa menghukum sebaliknya perlu mampu menangani isu utama dan kritis dalam kalangan umat Islam.

“Sepatutnya ia menangani isu yang lebih utama dan kritis khususnya meningkatkan kemampuan kakitangan dan kebajikan mereka.

“Kita tahu di setengah negeri, peguam bukan muslim masih tidak dibenarkan untuk beramal di mahkamah syariah sedangkan Islam itu sendiri universal dan mengutamakan keadilan,” ujar Dr Aziz.

Menjawab dakwaan PAS bahawa orang bukan Islam harus berdiam diri berhubung RUU355 tersebut, Dr Aziz menjelaskan ia tidak wajar kerana isu keadilan merupakan isu semua orang.

“Bukan muslim juga prihatin kepada kedudukan orang Islam, lagipun Mahkamah Syariah adalah institusi awam yang dibiayai oleh pembayar cukai yang merangkum orang bukan Islam. PAS tidak harus meminta bukan Islam supaya menutup mulut.

“Pokoknya, isu berhubung RUU355 bukan isu mengenai akidah atau hukum kerana ia adalah soal pelaksanaan Islam dan orang bukan Islam sebagai rakyat dan pembayar cukai perlu ambil tahu dan prihatin sama,” ujar beliau.

Pandikar cabut lari setelah hentikan perbahasan RUU355

KUALA LUMPUR: Speaker Dewan Rakyat, Tan Sri Pandikar Amin Mulia menangguhkan perbahasan mengenai pindaan usul persendirian pindaan RUU355.

Usul tersebut tidak dibuka kepada perbahasan selepas ia dibentangkan oleh Ahli Parlimen Marang, Datuk Seri Abdul Hadi Awang dan ucapan oleh Ahli Parlimen Kota Bahru Datuk Taqiyuddin Hasan.

Sebelum menangguhkan Sidang Dewan Rakyat, Pandikar memetik ‘kata-kata hikmat’ dari seseorang yang tidak dinamakannya.

“Saya ingin kongsikan satu kata-kata hikmat yang terpahat di fikiran saya sampai sekarang, if you are in power, you are powerful, if you don’t use your power, you are a bloody fool. (jika kamu ada kuasa, kamu berkuasa, jika kamu tidak gunakan kuasa yang ada pada kamu, kamu bodoh)

“Pada hari ini saya tak mahu menjadi bloody fool. Saya nak gunakan kuasa saya dengan membuat ketetapan supaya perbahasan (meminda Akta 355) diadakan pada sesi akan datang,” katanya.

Penangguhan perbahasan RUU355

itu dibacakan oleh Menteri di Jabatan Perdana Menteri Datuk Sri Azalina Osman Said sehingga ke satu tarikh yang tidak ditetapkan.

Dewan Rakyat bertukar menjadi kecoh seketika apabila Ahli-Ahli Parlimen bangun membantah penangguhan perbahasan usul kontroversi Presiden PAS itu ditangguhkan kira-kira jam empat petang tadi.

Malam sebelumnya, Dewan Rakyat mencipta sejarah apabila perbahasan berlangsung hampir 20 jam dan berakhir sekitar jam lima pagi.

FOKUS RUU355

“Nampaknya satu mainan politik yang memainkan jiwa rakyat. Tak pernah berlaku dalam Parlimen satu isu ditangguhkan sungguhpun ada masa.

“Saya rasa perkara ini boleh dijawab oleh Barisan Nasional (BN) ikut rentak masing-masing. MCA, MIC, Gerakan masing-masing ada jawapan mereka. UMNO ada jawapannya, semua ada jawapannya.”

“Adakah (keadaan) ini mencapai hasrat mana-mana pihak? Saya rasa rakyat tahu apakah jawapannya.”

Lim Guan Eng,
Setiausaha Agung DAP

“Permainan isu agama oleh UMNO dan PAS ini jelas menunjukkan bahawa parti selain UMNO dalam BN tidak relevan dalam proses membuat keputusan.

“Rakyat tidak harus berterusan diperbodohkan dengan kononnya konsep ‘perkongsian kuasa’ BN.”

Chong Chien Jen,
Ahli Parlimen Bandar Kuching

“Kerajaan, Presiden MCA, Presiden Gerakan, Presiden MIC dan semua Ahli Parlimen dari Sabah dan Sarawak perlu menjawab, apa yang terlalu mustahak sehingga usul itu diberi laluan berbanding usul-usul penting yang lain.

“Soalan ini harus dijawab oleh Perdana Menteri dan pemimpin komponen parti BN, tak ada makna kalau mereka kata tak akan bentang usul itu, sedangkan mereka membenarkan ia dibahaskan di Parlimen”

Tony Pua,
Setiausaha Publisiti DAP

“Macam sarkas. Apa yang dibuat Pandikar adalah tidak boleh diterima dan menyimpang daripada norma.

“Saya merasakan reputasi Parlimen telah tercalar dan rakyat Malaysia betul apabila mengatakan bahawa Parlimen kini tidak lagi relevan dalam mengangkat isu yang melanda negara,”

Senator Dr Ariffin Omar,
Naib Pengerusi
Kebangsaan DAP

BERITA RINGKAS

OLEH FATIH HASSAN NORDIN

**POLIS BATAL DEBAT
MAHATHIR-NAZRI**

Debat mengenai skandal 1MDB itu telah dibatalkan dua kali dengan alasan kyonnya ingin menjaga kententeraman awam. Namun, pihak pembangkang syak ia diarahkan Perdana Menteri, Datuk Seri Najib Razak yang turut terpalit dengan skandal syarikat bermasalah itu.

**TERESA KOK SAMAN
JAMAL YUNOS**

Akibat difitnah Jamal Yunos berhubung penyelewengan dana Yawasan Anak Selangor (YAWAS), Teresa yang juga Ahli Parlimen Seputeh bertindak menyaman Ketua Samseng Baju Merah itu.

**JALAN DARI DEWAN
RAKYAT KE RUMAH
RASMI SPEAKER
BERNILAI RM1.4 JUTA**

Jalan ke rumah Speaker yang dilalui hari-hari oleh Speaker seorang pun bernilai jutaan ringgit, tetapi rakyat yang hari-hari berhempas pulas cari rezeki dengan jalan yang sama dibiarkan dengan jalan berlopak dan rosak, adakah patut?

**HOSPITAL TAK CUKUP
KATIL, KERAJAAN
POTONG BAJET
KEMENTERIAN
KESIHATAN**

Kebanyakan yang mendapatkan rawatan ke Hospital Kerajaan adalah mereka dari golongan berpendapatan rendah. GST sudah dikutip berbilion ringgit, tapi apa hasilnya untuk rakyat miskin? Katil tak cukup.

**SATU KAMPUNG
HILANG
HAKMENGUNDI
GARA-GARA SPR**

Gelojoh mahu menangkan BN, SPR 'hilangkan' sebuah kampung iaitu Kampung Teratai dari syor persempadan semula mereka. Di mana 876 pemilih itu nak mengundi agaknya nanti?

MENTERI UMNO JANGAN BOHONG, DAP BELA RAKYAT PULAU PINANG

oleh SYERLEENA RASHID

Ketika merasmikan satu program pergigian di Masjid Negara, Ahli Parlimen Balik Pulau, Datuk Seri Dr. Hilmi Yahaya telah mendakwa bahawa Kerajaan Negeri Pulau Pinang khususnya DAP "tidak membantu golongan miskin dalam bandar menyebabkan jumlah mereka semakin bertambah."

Kenyataan sebegini ternyata ketandusan fakta, lagi-lagi kalau keluar daripada seorang menteri, hanya menampakkan beliau sebagai kurang boleh dipercayai. Terang lagi bersuluh, beliau cuba mereka cerita bagi membuat persediaan untuk pilihan raya yang dijangka akan tiba tidak lama lagi. Rakyat Malaysia sebenarnya sudah biasa dan jelak dengan momokan seperti ini.

Sebagai seorang anggota Parlimen di Pulau Pinang, sudah tentu Dr. Hilmy sudah menyaksikan dengan mata sendiri bagaimana kerajaan negeri telah menambah baik mutu kehidupan rakyat negeri ini.

Sejak 2008, kerajaan negeri di bawah pimpinan DAP telah mengilhamkan pelbagai jenis program kebajikan untuk membantu golongan miskin, tua, ibu tunggal, pelajar dan kumpulan-kumpulan lain. Walaupun berdepan dengan kegawatan ekonomi, pada tahun 2016, Kerajaan Negeri Pulau Pinang telah berjanji akan memperuntukkan RM61 juta untuk meneruskan program-program kebajikan tersebut.

Agenda Ekonomi Saksama, salah satu program yang dizahirkan kerajaan negeri, bertujuan meringankan beban kewangan keluarga miskin di mana kerajaan negeri akan menambah mana-mana yang kurang bagi pendapatan seisi keluarga tiap-tiap bulan sehingga genap RM790.

Bagi memastikan keberkesanan program ini, beberapa syarat telah diletakkan di mana para penerima perlu memberi perhatian kepada faktor-faktor kesihatan dan terutama sekali, pendidikan anak-anak mereka. Syarat-syarat ini penting bagi memastikan tiadanya salah guna kuasa dan sebarang penyelewengan.

Sehingga ke akhir tahun 2016, seramai 1375 isi keluarga telah merasai manfaat program – 81 peratus daripada penerima terdiri daripada orang Melayu, 11.35 peratus daripada orang India, dan 7.05 peratus orang Cina.



Usaha Kerajaan Negeri Pulau Pinang membela nasib rakyat tanpa mengira kaum dan latar belakang sentiasa cuba dipadamkan oleh pihak-pihak yang mahu menimbulkan perbalahan antara kaum.

Sejak 2008, kerajaan negeri di bawah pimpinan DAP telah mengilhamkan pelbagai jenis program kebajikan untuk membantu golongan miskin, tua, ibu tunggal, pelajar dan kumpulan-kumpulan lain. Walaupun berdepan dengan kegawatan ekonomi.

Sehingga ke akhir tahun 2016, seramai 1375 isi keluarga telah merasai manfaat program – 81 peratus daripada penerima terdiri daripada orang Melayu, 11.35 peratus daripada orang India, dan 7.05 peratus orang Cina.

penerima terdiri daripada orang Melayu, 11.35 peratus daripada orang India, dan 7.05 peratus orang Cina.

Dr. Hilmy juga menyatakan bahawa ramai pengundi Cina kini kian tidak puas hati dan hilang kepercayaan kepada kerajaan negeri kerana isu-isu ekonomi. Mungkin beliau merujuk kepada penutupan syarikat Amerika Syarikat, Rubicon Sapphire Technology (M) Sdn Bhd di mana 6 ribu pekerja kehilangan pekerjaan.

Walaupun Dr. Hilmy cuba mengelirukan rakyat Malaysia, hakikatnya, Pulau Pinang terus mendapat kepercayaan dan keyakinan para pelabur tempatan mahupun asing. Ini

ternyata apabila dalam masa 7 tahun (dari 2008 ke 2014), jumlah pelaburan langsung telah meningkat sebanyak 93 peratus kepada RM48.2 bilion berbanding RM24.9 bilion dari tempoh 2001 ke 2007 – semasa pentadbiran Barisan Nasional. Pada suku pertama tahun 2015, Pulau Pinang telah berjaya menarik sebanyak RM4.33 bilion pelaburan, manakala pada

suku pertama tahun 2016.

Sebagai seorang menteri Persekutuan, Dr. Hilmi harus memahami prinsip asas ekonomi iaitu permintaan dan penawaran. Penutupan kilang-kilang seperti Rubicon Sapphire Technology

(M) Sdn Bhd sebenarnya dipengaruhi faktor-faktor seperti kos penghasilan dan kos buruh, yang sebenarnya amat dipengaruhi oleh dasar kerajaan Persekutuan yang diterajui Barisan Nasional.

Selama ini, DAP konsisten dalam mengamalkan dasar kerajaan yang berpegang kepada CAT iaitu cekap, akauntabiliti dan telus. Tiada mana-mana kaum yang ditinggalkan atau dianaktirikan di Pulau Pinang. Hujah-hujah tidak masuk akal yang keluar dari mulut pemimpin-pemimpin Barisan Nasional sebenarnya merupakan usaha untuk menutup keadaan seadanya, di mana mereka mengaut keuntungan besar daripada amalan rasuah dan kronisme.

Sejak mengambil alih Kerajaan Negeri Pulau Pinang, DAP telah terbukti lebih membantu rakyat dan mereka yang berada dalam keperluan, tanpa mengambil kira bangsa atau agama. Barisan Nasional pula, masih terperangkap dalam politik yang menjaja ketakutan. Sekiranya Barisan Nasional ingin dilihat prihatin kepada rakyat, maka sudah tiba masanya mereka melakar dasar yang memanfaatkan rakyat dalam jangka masa panjang.

*Syerleena Abdul Rashid adalah Penolong Setiausaha Publisiti Negeri DAP Pulau Pinang

'NAJIB, BERAPA KALI ANDA BERJUMPA JHO LOW?'

KUALA LUMPUR: Di sebalik serangan peribadi Barisan Nasional (BN) memburuk-burukkan imej Ketua Parlimen DAP Lim Kit Siang, beliau sebaliknya melontarkan satu soalan mudah buat Perdana Menteri Datuk Seri Najib Razak.

Soalan ini sebagai reaksi Kit Siang terhadap serangan yang disifatkannya sebagai 'pembohongan strategik BN' melalui Utusan Malaysia yang menggambarkan bahawa Pakatan Harapan merupakan 'ali baba' kononnya dikawal oleh beliau.

"Berapa kalikah Perdana Menteri bertemu Jho Low, di mana dan bila, setelah Pilihan Raya Umum ke-13 dan adakah abda bertemu Jho Low semasa lawatan rasmi terakhirnya ke China?"

"Dan apakah yang telah dibincangkan mereka selepas Pilihan Raya Umum ke-13 pada 5 Mei 2013, apabila Jho Low telah ditolak sendiri oleh rakyat Pulau Pinang setelah berhabis 10 juta ringgit untuk menjatuhkan Kerajaan Pulau Pinang yang dipimpin oleh Lim Guan Eng selaku Ketua Menteri?

"Atau adakah Najib mengakui bahawa dirinya tidak pernah bertemu Jho Low selepas pilihanraya 2013?" soalnya dalam sidang parlimen hari ini.

Ahli Parlimen Gelang Patah itu menegaskan, tidak ada sesiapa yang percaya bahawa Pakatan Harapan merupakan sebuah organisasi 'Ali Baba'.

"Tetapi tidak syak lagi bahawa rakyat Malaysia yakin bahawa Najib bertanggungjawab mewujudkan gabungan 'Ali Baba' di Malaysia dalam pakatan 'Najib-Jho Low' yang telah menyebabkan Malaysia dikenali sebagai negara kleptokrasi global akibat skandal kewangan mega 1MDB saat ini."

"Bolehkah kita minta Pengarah Komunikasi Strategik BN untuk bertanyakan soalan ini kepada Perdana Menteri dan bukannya terlibat dengan kempen jahat 'pembohongan strategik'?" soal beliau.

Menurut beliau, kempen jahat berbaur fitnah yang dilancarkan Utusan Malaysia melalui sebuah logo dengan imej dirinya, Datuk Seri Anwar Ibrahim, Tun Dr.



Mahathir, Datuk Seri Azmin Ali, Datuk Seri Dr. Wan Azizah Wan Ismail, Mohd Sabu dengan kapsyen "ASALKAN BUKAN PAKATAN KIT SIANG" adalah kelakar.

"Di sini saya merayu kepada Utusan Malaysia dan pemimpin UMNO supaya tidak memalukan atau menjatuhkan maruah bangsa Melayu sendiri dengan

menggambarkan tokoh-tokoh Melayu yang pernah menjawat sebagai Perdana Menteri, Timbalan Perdana Menteri, Presiden dan Timbalan Presiden UMNO memiliki moral yang rendah yang kononnya telah menjadi boneka setelah mereka tidak lagi menjawat jawatan tersebut!" katanya lagi.

SEBENARNYA 1MDB MASIH MENANGGUNG HUTANG LEBIH RM39 BILION – Tony Pua

KUALA LUMPUR, 31 MAC: Kenyataan Perdana Menteri, Datuk Seri Najib Razak bahawa hutang bank dan jangka pendek 1MDB telah selesai seolah-olah mencipta persepsi yang salah bahawa kononnya syarikat bermasalah milik negara itu kini bebas hutang.

Sedangkan, Ahli Parlimen Petaling Jaya Utara, Tony Pua berkata, jumlah hutang 1MDB yang ditanggung Kerajaan Persekutuan secara langsung dan tidak langsung masing-masing kini mencecah RM5 bilion dan US\$7.73 bilion dengan jumlah keseluruhan melebihi RM39 bilion.

Ini, katanya, termasuk:

- **Bon 30 tahun bernilai RM5 bilion yang mana dijamin kerajaan Persekutuan**
- **Dua bon 10 tahun bernilai US\$1.75 bilion yang mana dijamin oleh syarikat Abu Dhabi, International Petroleum Investment Corporation (IPIC) dan sehingga kini dibayar oleh Kementerian Kewangan Diperbadankan (MoF Inc)**
- **Bon 10 tahun bernilai US\$3 bilion, dijamin dengan "Surat Sokongan" yang dikeluarkan Menteri Kewangan.**
- **Pendahuluan daripada IPIC bernilai US\$1 bilion, dilindungi oleh MoF Inc.**
- **Sekurang-kurangnya US\$230 juta pembayaran faedah oleh IPIC bagi pihak 1MDB, dilindungi oleh MoF Inc.**

"Jika perkara ini tidak menyebabkan Najib Razak dinobatkan sebagai 'Raja Pengeliru' di Malaysia, saya tak tahu nak kata apalah," katanya yang juga Setiausaha Publisiti DAP dalam kenyataan hari ini.

Najib yang menjawab persoalan Ahli Parlimen Bakri, Er Teck Hwa yang meminta angka kemaskini berhubung kaitangan 1MDB, aliran tunai, hutang dan aset 1MDB, berkata syarikat itu tidak mempunyai hutang bank dan jangka masa pendek setakat Januari 2016.

"Pada masa ini, 1MDB tidak mempunyai apa-apa hutang bank dan jangka pendek," kata Najib dalam jawapan bertulis di Parlimen.

Dalam perkembangan serupa, Tony menegaskan beliau kekal dengan pendirian tidak tunduk kepada tuntutan maaf kepada Perdana Menteri, Datuk Seri Najib Razak berhubung rakaman video ucapananya yang dimuat naik di Facebook.

Ia sebagai respon kepada surat tuntutan daripada peguam kepada Najib, Datuk Mohd Hafarizam Harun yang menuduh kononnya Tony Pua membuat kenyataan fitnah dalam video yang dimuat naik di Facebook miliknya bertajuk "BN Govt Abandons all Bills to give precedence to PAS' RUU355 Private Member's Bill".

Dalam video itu, Tony antara lain mengulangi apa yang pernah ditegaskannya sebelum ini berkenaan gejala rasuah melibatkan perdana menteri dengan menggunakan istilah 'kleptokrat' merujuk kepada sebuah kerajaan yang mencuri sumber negara.

"Saya berpegang kepada kenyataan



saya sebelum ini. Jadi, saya tidak akan tarik balik kenyataan itu atau memadam rakaman tersebut."

"Saya juga tidak akan membuat permohonan maaf secara terbuka kepada Perdana Menteri mahupun bayar ganti rugi kepada Datuk Seri Najib Razak," kata Tony dalam kenyataan, hari ini.

Menurut Setiausaha Publisiti DAP itu, apa yang diadukan beliau dalam video tersebut adalah fakta sebenar yang tidak boleh dipertikaikan lagi.

Sebaliknya, orang yang didakwa melakukan kesalahan itu, Najib Razak pula tidak pernah menafikan atau

mempertikaikan fakta yang diadukan oleh The Sarawak Report dan The Wall Street Journal sebagaimana yang disahkan oleh Jabatan Kehakiman Amerika Syarikat (DOJ).

"Perlu diambil maklum, Datuk Seri Najib Razak tidak pernah mempertikaikan atau menafikan fakta yang dibentangkan DOJ sejak Julai 2016," katanya lagi.

Tony sekali lagi menegaskan bahawa segala bukti dan fakta telah disertakan dalam samannya terhadap Perdana Menteri dan kerajaan pada 16 Januari lalu atas dakwaan terlibat dalam salah guna kuasa pentadbiran melibatkan 1MDB.

Tangguh 3 kali, RUU355 skrip terancang UMNO-PAS

KUALA LUMPUR: Drama Rang Undang-undang (RUU) 355 yang berlangsung di Dewan Rakyat didakwa mengikut skrip yang ditulis secara terancang oleh UMNO bersama-sama pengikut barunya, PAS.

Malah, Ketua Parlimen DAP, Lim Kit Siang mendakwa kehadiran Timbalan Perdana Menteri, Datuk Seri Zahid Hamidi pada sesi mesyuarat itu adalah untuk memastikan Speaker Dewan Rakyat, Tan Sri Pandikar Amin Mulia mengikut skrip yang telah disediakan.

Jalan cerita itu, jelas Kit Siang, diatur supaya Presiden parti Islam itu, Datuk Seri Abdul Hadi Awang dapat membentangkan usul persendirianya itu untuk kali ketiga tanpa melepas sesi perbahasan melibatkan pembangkang serta proses pengundian belah bahagi.

"Inilah sebab mengapa mesyuarat Dewan Rakyat pada Rabu berlarutan

sehingga 5.05 pagi keesokannya selama hampir 20 jam, dan lima RUU kerajaan dikeluarkan (dari aturan mesyuarat).

"Ia sebenarnya dibuat bagi mengosongkan agenda Dewan Rakyat pada Khamis untuk memberi laluan kepada satu perkara, hanya satu perkara, iaitu usul persendirian Hadi," katanya dalam kenyataan hari ini.

Dakwaan itu, menurut Kit Siang yang juga Ahli Parlimen Gelang Patah, diperkuatkan lagi dengan pengakuan Presiden MIC, Datuk Seri Dr. S. Subramaniam bahawa pemimpin Barisan Nasional (BN) bukan UMNO tahu mengenai perancangan yang diatur parti Melayu itu dan PAS.

"Subramaniam berkata keputusan itu, yang dibuat dalam mesyuarat Dewan Tertinggi Barisan Nasional, adalah untuk membenarkan PAS membentangkan hujah mereka berhubung usul Hadi

tetapi tidak akan ada perbahasan atau pengundian.

"Justeru, adakah Hadi mempergunakan Perdana Menteri, Datuk Seri Najib Razak yang juga Presiden UMNO, ataupun sebenarnya Najib yang mempergunakan Hadi (dalam hal ini)? soalnya."

Parlimen menyaksikan buat kali ketiga, usul persendirian Hadi bagi memindahkan Akta 355 itu dibentangkan di Dewan Rakyat dan akhirnya mendapat sokongan Setiausaha Agung PAS, Datuk Takiuddin Hassan yang memberi hujah panjang lebar mengenai usul tersebut.

"Speaker Parlimen tidak boleh jadi seorang diktator dan semua dakwaan Speaker semalam mengenai ketuanan Parlimen hanyalah untuk mengaburi mata, kerana realitinya, Speaker mengikut telunjuk Eksekutif (yang diketuai UMNO)," tegas Kit Siang.



'Butir Tahi': Anak muda DAP nasihat Hadi istighfar banyak-banyak

KUALA LUMPUR: Sekumpulan anak muda DAP melahirkan rasa kesal dan kecewa dengan kata-kata kesat yang dilontarkan Presiden PAS Datuk Seri Abdul Hadi Awang dengan menyifatkan DAP sebagai 'anak butir tahi PAP'.

"Kami merakamkan perasaan sedih dan kecewa dengan ayat-ayat ini yang dituturkan dua bibir seorang ulama, apakah lagi seorang Timbalan Ketua Kesatuan Ulama Muslimin Sedunia.

"Kami tidak melihat sebarang kebaikan atau hikmah daripada bicara Haji Hadi dengan kata-kata yang begitu kesat, dan tidak padan dengan sunnah kenabian yang cuba beliau amalkan sehari-hari," kata kenyataan bersama.

Kenyataan itu turut memetik surah an-Nahl, ayat 125 yang maksudnya; "Serulah

(manusia) kepada jalan Tuhan-mu dengan hikmah dan pelajaran yang baik dan bantahlah mereka dengan cara yang baik. Sesungguhnya Tuhanmu Dialah yang lebih mengetahui tentang siapa yang tersesat dari jalan-Nya dan Dialah yang lebih mengetahui orang-orang yang mendapat petunjuk."

Ekoran kenyataan jeliknya itu, Hadi diseru supaya berasa malu dan bertaubat atas tutur katanya yang memalukan.

"Haji Hadi wajar bertaubat dan malu, membiarkan lidah yang gigih berzikir dan menuturkan nama Tuhan, dicemari kata-kata kotor dan kesat."

"Kami bangga menjadi mata rantai penerus perjuangan DAP, biarlah apa pun kata Haji Hadi."

"Kami lega kerana ditakdirkan tidak

punya pemimpin yang jijik kata tuturnya, meski giat menyebut bahasa agama dan ketuhanan," kata mereka.

Hadi seperti dilapor Malaysiakini dalam ucapannya di Rusila melafazkan kata-kata kesat itu ketika menggambarkan kononnya DAP merupakan jelmaan PAP setelah Singapura berpisah dari Malaysia.

"Kami ingin tekankan bahawa DAP dan PAP tidak ada kena mengena secara parti-ke-parti. Hanya beberapa pengasas DAP pernah menganggotai PAP ketika parti tersebut masih wujud di Malaysia. DAP dan PAP bukan parti adik beradik, atau yang sepertinya."

"Sudah lebih 50 tahun DAP berjuang demi sebuah negara yang aman makmur dengan kebebasan, keadilan, dan solidariti untuk seluruh rakyatnya, tanpa

"DAP dan PAP bukan parti adik beradik, atau yang sepertinya."

mengira latar kaum, agama, budaya dan daerah," jelas kenyataan itu.

Dalam pada itu, mereka turut merakam rasa simpati terhadap kader-kader PAS yang ternyata telah meninggalkan tarbiah dan manhaj yang digariskan Almarhum Tuan Guru Nik Aziz Nik Mat.

"Semoga Haji Hadi banyak beristighfar dan merujuk kembali ajaran Islam sebenar yang santun dan penuh hikmah. Tinggalkanlah Islam yang penuh marah-marah, dan hidupkan Islam yang ramah tamah," ujar kenyataan itu lagi.

Kegagalan Zahid Hamidi, punca Najib angkat sepupu jadi Menteri Tugas Khas

KUALA LUMPUR: Pelantikan Datuk Seri Hishammuddin Hussein sebagai menteri tugas-tugas khas di Jabatan Perdana Menteri mencerminkan kegagalan keseluruhan jentera propaganda dan perancangan Perdana Menteri Datuk Seri Najib Razak.

Pelantikan itu juga kata Ketua Parlimen DAP Lim Kit Siang menunjukkan bahawa Najib bukan sahaja hilang keyakinan kepada timbalannya Datuk Seri Ahmad Zahid Hamidi tetapi juga hilang kepercayaan terhadap orang kuatnya sendiri seperti Datuk Seri Abdul Rahman Dahlan, Datuk Seri Salleh Said Keruak and Datuk Seri Ismail Sabri Yaakob.

"Ini merupakan kegagalan serangan propaganda baru yang

dilancarkan selepas UMNO mengalami 'pembersihan' pada Julai 2015 yang menyaksikan pelantikan Timbalan Perdana Menteri dan Pengarah Strategik Media BN yang baru," katanya.

Menurut Kit Siang, beliau tidak melihat pelantikan Hishammuddin sebagai langkah Najib untuk berundur sebelum Pilihan Raya Umum (PRU) ke-14 tetapi merupakan indikasi segala perencanaan Najib tidak berjalan lancar.

"Dia (Najib) perlukan Menteri yang 'super' untuk menyelamatkan keadaan."

"Hishammuddin mungkin tidak menjadi Timbalan Perdana Menteri tetapi jelas sekarang, beliau menjadi orang kedua paling berkuasa dalam kerajaan UMNO-Barisan Nasional (BN)," katanya.



Akuan bersumpah Rafizi dakwa Nasharudin Mat Isa terima dana terkait 1MDB

KUALA LUMPUR: Ahli Parlimen Pandan, Rafizi Ramli dalam akuan bersumpahnya mendedahkan bekas Timbalan Presiden PAS Datuk Nasharudin Mat Isa telah menerima dana melibatkan 1MDB melalui akaun Perdana Menteri Datuk Seri Najib Razak.

Maklumat tersebut kata Rafizi, diperolehnya dari bekas pegawai 'paling kanan' dalam Suruhanjaya Pencegahan Rasuah Malaysia (SPRM) yang turut terlibat menjalankan siasatan terhadap kes berkenaan.

"Beliau menyebut kepada saya bagaimana siasatan SPM turut mengesahkan sejumlah wang yang dibayar dari akaun peribadi Yang Amat Berhormat Datuk Seri Najib Tun Razak yang sampai kepada Dr Nasharuddin Mat Isa mantan Timbalan Presiden PAS," dedahnya dalam sidang media sebentar tadi.

Rafizi dalam akaun bersumpahnya itu

menceritakan secara terperinci butiran mengenai siasatan SPRM melibatkan penyelewengan 1MDB yang diceritakan secara lisan oleh pegawai kanan SPRM tersebut.

"Siasatan SPRM ke atas SRC International Sdn Bhd mendapat sejumlah dana dari SRC International Sdn Bhd telah dipindahkan ke akaun peribadi Datuk Seri Najib Tun Razak.

"Dari akaun Datuk Seri Najib Tun Razak, terdapat bayaran kepada peguam tertentu. SPRM telah menyalah siasat peguam tersebut dan mendapatkan bukti tokoh-tokoh yang dibayar menggunakan wang SRC International Sdn Bhd yang disalurkan melalui peguam tersebut."

"Salah seorang dari penerima bayaran dari peguam tersebut adalah Dr Nasharuddin Mat Isa, mantan Timbalan Presiden PAS," ujar beliau.

Menurut Naib Presiden PKR itu, aliran

sejumlah wang kepada bekas pimpinan tertinggi PAS tersebut boleh disiasat di bawah pelbagai undang-undang negara jika bayaran itu sebagai pertukaran melunakkan suara PAS dalam isu 1MDB.

"Saya percaya maklumat ini wajar diketahui oleh rakyat terutamanya mengenai aliran dana SRC International Sdn Bhd ke akaun peribadi Datuk Seri Najib Tun Razak yang kemudian disalurkan ke tokoh-tokoh tertentu terutama seorang mantan pimpinan tertinggi PAS yang kita ketahui paling lantang memperjuangkan kerjasama UMNO dan PAS," jelas beliau.

Rafizi dalam sidang media itu turut mendedahkan bahawa Ahli Parlimen Kuala Neris, Datuk Dr Khairul Aman Razali pernah menemui pegawai SPRM itu untuk mendapatkan kepastian penglibatan Najib Razak dalam skandal 1MDB.

"Pegawai penyiasat terkanan itu

memaklumkan kepada saya bahawa beliau ada memberi maklumbalas secukupnya kepada permintaan mendapatkan kesihihan dari Datuk Dr Khairudin Aman Razali itu," dedahnya lagi.

Tegas Rafizi, tindakannya membuat akaun berkanun bertujuan supaya siasatan mengenai penyelewengan 1MDB dapat dibuka semula.

"Apabila dibuat dibawah akaun berkanun kalaupun ada mana-mana bahagian tidak benar, maka satu laporan polis dibuat dan saya boleh ditangkap.

"Saya buat akaun berkanun supaya kalaupun petang ini ada perkara yang saya sebut ini tak betul dan ada buktinya, maka boleh laporan polis dan kita akan melalui proses undang. Saya akan lebih gembiramelalui proses perundangan. Sebab, bila ada proses perundangan, kita ada kedudukan mengikut undang-undang (legal position) untuk hadapkan isu 1MDB ke mahkamah," jelas beliau.

Dakwaan PAS terima RM90 juta dana 1MDB, bila mahu saman?

KUALA LUMPUR: PAS yang mengaku memperjuangkan Islam di negara ini harus segera menjawab dakwaan bahawa terdapat sejumlah wang yang berasal dari 1MDB mengalir ke akaun seorang tokoh yang rapat dengan pemimpin utamanya.

Naib Pengerusi DAP Pahang, Tengku Zulpuri Shah Raja Puji berkata, pemimpin PAS harus segera menjawab dakwaan itu kerana ia melibatkan martabat Islam yang sering dilaung-laungkan parti itu.

"Pemimpin PAS sepatutnya tahu bahawa kesalahan rasuah itu amat berat di sisi agama. Untuk tidak mencetuskan imej buruk terhadap Islam, pemimpin PAS harus segera menjawab dakwaan ini," katanya yang juga Adun Mentakab.

Beliau berkata demikian ketika diminta

mengulas mengenai pendedahan Naib Pengerusi PKR, Rafizi Ramli bahawa terdapat sejumlah wang yang berasal daripada syarikat terpalit skandal, 1MDB masuk ke akaun seorang tokoh yang rapat dengan pimpinan tertinggi PAS.

Rafizi yang juga Ahli Parlimen Pandan turut mendakwa Suruhanjaya Pencegahan Rasuah Malaysia (SPRM) telah mengesahkan aliran tunai berkenaan.

Bukan sahaja Rafizi, bekas pemimpin PAS, Datuk Husam Musa turut mendakwa PAS menerima RM90 juta daripada UMNO melalui akaun Affin Bank. Ia rentetan daripada laporan laman pembocor maklumat, Sarawak Report.

Ekoran itu, Timbalan Presiden PAS,

Datuk Tuan Ibrahim Tuan Man seperti dilaporkan media pada 9 Februari lalu, mahu menyaman Husam sebagaimana yang didakwa dibuat PAS sebelum ini terhadap Sarawak Report.

Bagaimanapun, sehingga kini, tidak ada saman yang dikeluarkan PAS terhadap Husam dan Sarawak Report, yang ada hanyalah surat tuntutan oleh parti Islam itu terhadap laman kendalian Clare Rewcastle Brown tersebut pada 13 Disember tahun lalu.

"Sepatutnya PAS menyaman Sarawak Report bagi membersihkan nama baik parti itu dan turut menyaman Husam jika benar dakwaan itu hanya fitnah. Janganlah gunakan agama hanya sekadar untuk berpolitik," ujarnya.

"Pemimpin PAS sepatutnya tahu bahawa kesalahan rasuah itu amat berat di sisi agama. Untuk tidak mencetuskan imej buruk terhadap Islam, pemimpin PAS harus segera menjawab dakwaan ini,"

**Tengku Zulpuri Shah Raja Puji
Naib Pengerusi DAP Pahang**

UMNO buat bantahan palsu, ribuan anak muda Selangor dinafi hak mengundi

SERDANG: Pengarah Strategi Pilihan Raya DAP, Dr Ong Kian Ming mempersoal tindakan Suruhanjaya Pilihan Raya (SPR) yang membenarkan UMNO membuat bantahan palsu terhadap pengundi muda yang baru berdaftar sebagai pemilih.

"Kami telah menerima bukti bahawa bantahan di Selangor ini difailkan oleh ahli-ahli UMNO dan entiti berkaitan UMNO.

"SPR perlu menghentikan perkara ini serta-merta, hentikan semua bantahan palsu tak berasas yang sedang berlaku di Selangor saat ini," gesanya dalam kenyataan.

Menurut Dr Ong, sehingga suku ketiga

tahun 2016, sejumlah 4,694 bantahan telah diterima oleh SPR manakala pada suku keempat pula menyaksikan sejumlah 2,550 bantahan dibuat.

"Dari 4,694 bantahan, 94 peratus atau 4,427 bantahan telah difailkan di Selangor. Ini menunjukkan mereka menumpukan bantahan ini di Selangor," kata beliau.

Ahli Parlimen Serdang itu menjelaskan, analisa yang dari suku pertama sehingga suku ketiga tahun 2016 itu mendapat, 30 daripada 36 kawasan pilihanraya yang dibantah itu merupakan kerusi yang ditandingi UMNO dalam Pilihan Raya Umum (PRU) ke-13 lalu.

Apa yang menarik perhatian, 92.8

peratus pemilih baru yang dibantah merupakan pengundi berketurunan Cina, 5.8 peratus pengundi India dan 1.2 peratus pengundi Melayu.

Bagi suku keempat tahun 2016 pula, sejumlah 2,550 bantahan telah dibuat di Selangor melibatkan 24 kerusi.

"20 daripada 24 kerusi atau 83 peratus dari adanya merupakan kerusi yang ditandingi UMNO pada pilihanraya 2013," jelas Dr Ong.

Daripada jumlah 2,550 itu kata beliau, 14.2 peratus adalah pengundi Melayu, 79.1 peratus pengundi Cina dan 6.3 peratus pula pengundi India.

Dalam masa yang sama, beliau menegaskan bahawa pihaknya tidak

menentang hak untuk mana-mana pihak membuat bantahan terhadap pengundi, bagaimanapun, ia perlulah dibuat berdasarkan kes yang kukuh.

Misalnya, kata Dr Ong, seperti bantahan yang dibuat di Johor melibatkan pendaftaran beramai-ramai di premis atau rumah yang meragukan.

"Dalam kes di Selangor, kami telah terima banyak aduan tentang berdasarkan alasan palsu seperti 'alamat pengundi tidak dapat ditemui' atau 'pengundi tidak dikenali penduduk setempat' sedangkan pembantah sendiri tidak pernah datang melawat pengundi di alamat tersebut," katanya lagi.

CHEF WAN PUJI PENTADBIRAN PULAU PINANG

KUALA LUMPUR: Selebriti terkemuka dunia, Chef Wan atau nama sebenarnya Datuk Redzuawan Ismail berkongsi kisah gembira seorang pemandu teksi mengenai kejayaan kerajaan negeri Pulau Pinang yang diterajui DAP di laman sosial Instagramnya.

Pemandu itu dirakamkan bercerita mengenai pengalamannya menemui pelancong yang rata-ratanya memuji keadaan negeri itu yang bersih serta kesungguhan kerajaan negeri memulihara bangunan-bangunan lama.

Beliau yang tidak mahu dikenali berkata, usaha yang ditunjukkan pentadbiran kini amat berbeza dengan Barisan Nasional (BN) yang pernah mentadbir negeri itu suatu ketika dahulu.

"Saya tak tengok bangsa tak tengok agama tak tengok kulit, siapa yang bagus, saya ikut," katanya.

Rakaman tersebut turut disertakan dengan catatan Chef Wan yang turut mengakui bahawa pentadbiran kerajaan yang baik dapat dilihat dan terbukti.

"Benar, pentadbiran kerajaan yang baik akan diakui dan dipuji oleh pelancong yang melawat negara kita," kata Chef Wan.

"Rakyat sendiri hari ini boleh menilai segalanya dengan permainan kotor dan teruk yang dipentaskan."

"Hanya orang bodoh tidak boleh melihat semua ini seperti masing-masing ada agenda tersendiri kononnya takut itu dan ini."

Beliau turut mengkritik sikap sesetengah pemimpin politik yang sering menggunakan sentimen kaum sehingga menimbulkan rasa muak dalam kalangan rakyat.

"Rakyat sendiri hari ini boleh menilai segalanya dengan permainan kotor dan teruk yang dipentaskan.

"Hanya orang bodoh tidak boleh melihat semua ini seperti masing-masing



ada agenda tersendiri kononnya takut itu dan ini.

"Bagaimanapun, kalau kamu jujur dan mahu membawa perubahan untuk

negara ini kamu akan buat tanpa apa-apa propaganda yang kita lihat dalam kalangan ahli politik, naik meluas," katanya.

UMNO sedang membunuh PAS

JOHOR BAHRU: Pengumuman PAS menerusi Naib Presidennya Datuk Idris Ahmad bahawa parti itu akan bertanding di 80 kerusi Parlimen dalam Pilihan Raya Umum (PRU) ke-14 akan datang merupakan bukti bahawa PAS sedang bekerja untuk UMNO.

Tindakan PAS itu kata Pengarah Biro Pendidikan Politik DAP Johor, Mahdzir Ibrahim secara tidak langsung akan memberikan kelebihan kepada UMNO untuk menang.

Ia ekoran PAS merasa cukup terhutang budi kerana UMNO berjaya membawa pentas lakonan RUU355 di parlimen dengan cukup licik.

"Ini dirasakan oleh PAS sebagai laba politik kepada mereka. Maka PAS dengan bangga dan yakin akan kembali kepada penyokong tegarnya dengan membawa satu kejayaan RUU355.

"Budi UMNO kepada PAS ini akan 'membawa mati' kepada PAS. Ini realitinya," kata beliau.

Jelas Mahdzir, walaupun di atas kertas undi, PAS menjadi lawan UMNO kerana mereka tidak bergabung dibawah satu logo secara rasmi, tetapi realiti politik menyatakan sebaliknya.

Menurutnya, kerjasama PAS dan UMNO ini juga dapat dilihat jelas berdasarkan kenyataan dan tindakan yang dibuat pemimpin-pemimpin PAS sebelum ini.

"Haji Hadi juga pernah 'kanto' dengan ucapan untuk mengagih-agihkan kawasan PAS dan UMNO untuk diperintah," katanya.

"Budi UMNO kepada PAS ini akan 'membawa mati' kepada PAS. Ini realitinya"

Mahdzir Ibrahim

Ini termasuk kenyataan PAS yang pernah memberi gambaran bahawa mereka sanggup kalah dalam pilihan raya asalkan 'Islam' (RUU355) berjaya dibentangkan di Parlimen.

Walaupun mungkin segelintir pemimpin PKR dan Parti Pribumi Bersatu Malaysia (PPBM) akan terus berusaha untuk memujuk dan berunding dengan PAS agar berlembut di saat akhir, Mahdzir menjelaskan ia tidak akan menjamin apa-apa rundingan.

"Balai ini akan ditanggung bukan sahaja ke atas parti yang berunding dengan PAS, malah semua parti juga menerima akibatnya.

"Kepimpinan PAS pernah membelakangkan perjanjian. Ketika mereka bekerjasama secara rasmi dalam Pakatan Rakyat pun mereka masih gagal menghormati perjanjian yang telah ada hitam putih, apakah lagi sekarang yang tidak ada hubungan rasmi dengan PKR dan PPBM," katanya lagi.

Melayu tak 'liberal' pun boleh pilih DAP

KUALA LUMPUR: DAP merupakan parti berbilang kaum yang menarik minat orang Melayu yang mahu maju kehadapan dan bersungguh-sungguh memperjuangkan nasib rakyat Malaysia.

Sepanjang penubuhannya, DAP juga komited memperjuangkan ketelusan, integriti, menentang rasuah, salah guna kuasa, serta menjunjung tinggi Perlembagaan Persekutuan.

Justeru, tidak timbul soal DAP adalah parti pilihan Melayu yang berfikiran liberal atau tidak, kata bekas Menteri UMNO, Datuk Zaid Ibrahim.

"DAP bukannya parti untuk orang melayu yang liberal ke tak liberal.

"(DAP adalah parti untuk) orang Melayu yang mahu ke hadapan, yang mahu memahami isu masyarakat, yang mahu mencari penyelesaian kepada masalah itu," katanya dalam program temubual, Heli Roket!

Beliau berkata, DAP yang disertainya pada Februari lalu berbeza dengan parti yang sering melemparkan tuduhan anti-Melayu dan anti-Islam.

"PAS pergi Parlimen di Dewan Rakyat cakap itu cakap ini, kosong.



(Tapi) apa cadangan dia daripada segi ekonomi, daripada segi sosial, daripada segi masalah manusia? yang dia tahu dosa, pahala," ujarnya.

Malah, beliau turut menegaskan keperluan untuk orang Melayu meninggalkan politik ketinggalan zaman yang hanya menyentuh sentimen kaum dan agama demi perubahan seiring dengan kemajuan dunia masa kini.

"(Bangsa lain) fikir untuk buat (kemajuan) sains, kejuruteraan, teknologi maklumat (IT), komputer teknologi, perubatan, dan pelbagai kajian dalam peringkat pengajian tinggi.

"Namun, orang Melayu masih lagi fikir dalam politik Melayu, seperti RUU355, (soal) kahwin muda, inilah politik Melayu. Kita ketinggalan beribu tahun daripada bangsa-bangsa lain," ujarnya.

SIDANG EDITORIAL

EDITOR • IZMIL AMRI WARTAWAN • HAFIZ ZAINUDDIN • FATIH HASSAN NORDIN JURUGAMBAR • AHMAD YUSIFI GRAFIK • AMIN IDRIS